

ILADIG ZUM BÄÄRGR BASAR [Anni Hilbe]

Vor Weihnachten wurden wie noch heute den Leuten die Möglichkeit geboten, für Weihnachten eventuelle Geschenke günstiger und bewusster einzukaufen.

Am erschta Advent-Suntig und scho am Samstig vorhar
wil d'r Trisnerbäärg'r Fraua-Verein an Bazar ha,
dr-zua lad-w-r alls i vam Bäärg
und us-m Tal und au dia uberm Rhie,
chomat au amal har, as ischi wahrli dr-wärd, r-wärdets de seh,
dera schöna Waar chunt-ma nid uberal z'seh.

As ischt jetzt günschtig u. gäbig
zum z-Christ-chindli schtöra
bringt d'Goofa grad mida,
de chunnatr d'Wünsch scho höra.

As gid Tiarli und Poppi sogar Zwilling sind dr-bei,
an Schälla-Ursli oder an Hoppssassa nümt jedes gära hei,
Rocki und Tschoopi für Chind, ja gänzi Häässli sind v-r-handa,
au di grössara chond nid z'churz, schi nänd sichr ättas z'handa.

Täscha und warm Schääf für Meitja und Stelza für Buaba,
noch villerlei ischt umha zum chaufa, biwundra und luaga,
Bettsöck, Chneuschtrümpf, Händscha, Lismer und Chappa,
ganz Hüüfa glismet Härasöck und für d'Fraua schö Jagga,

Schöss mit Falbala gits au odr zum sälb-schniedra an Räschta,
Lavendl-Sacki schmeckn au besser as Schaba-Bolla i-da Chäschta.
Wundr-schö Handarbeits gits glismat, ghägglet und knüpft,
das eim bim Aluaga scho z'Härz und d'r Gäldseckel hüpft

Deckana, Tasi, Poppa-Häässli buntfarbig us Wolla,
ma cha lang nid alls uf-zella, sus wer Zietig scho volla,
au gäga Hunger und Durscht ischt beschtens vor-gsoorgat
vil Husgmachets ischt umha schö uf-gschtelld u. g'ordnet.

Melissa-Sirup, Latwäri va Bromberi, Holder und Quitta
Imma-Hung und Eiergonjak sind sich'r guat g'litta.
Huslikör und Wieberschnaps chaufets und probierats
daheimat freut schi jungs und alts wend-r-s särwiarat.

Wia frühajer gräuchts Fleisch u. Suppa-n-Ärbsa dr-zua,
as ischt albi noch so fuahrigs und so guats as wia dua.
Ir Chuchi gits Kaffee und husbaches Birabrod dr-zua,
dia Fraua händ g'schaffat ahni Rascht und ahni Ruah.

Wehja hänsch bacha, Chuacha und Torta
sälbgmachati Zälti va villerlei Sorta.

Drum chomat und chaufat, offerat an par Schtunda
as ischt ja dr-mid as guats Wärch noch v-rbunda.